

Cun svung e fracass a l'Europeada 2022

Sonda ha entschet en Austria la quarta Europeada – cun participaziun da dus squadras rumantschas.

Cun baterladas e fracass

GIUANNA CAVIEZEL

Gnanca las giaglinas levàn uschè baud! A las 4.15 ha mes svegliarin sdrappà mai or da la fasa REM. Sch'ins sa renda – voluntariamain – già da questas uras da la val ora, stoi esser in-satge impurtant. L'Europeada cloma!

Noss viadi cun Christoffel è stà fitg instructiv (nus enconuschain ussa ils numns da divers chastels, lais e lieus tranter il Grischun e la Carinzia) e divertent. Qua e là hai schizunt dà in u l'auter discurs filosofic, intginas runcadas e pliras risadas. Jau per mia part hai baterlà durant diesch uras, pia fatg ir la mola senza interrupziun. Per sa stgaurdar.

Deplorablamain avain nus stuì bandunar il Grischun cun ina squadra da dunnas anc pli decimada che quai ch'ella era già avant che partir. Uschia essan nus arrivads a la festa d'avertura cun ina missiun – la missiun da chattar ina schliaziun per noss «problem». E questa missiun avain nus nati-ralmain adempli, grazia a noss supras-tant *Flurin Bundi* che ha discurrì cun numerusas persunas suenter la ceremo-

nia d'avertura, nua che tut las squadras èn marschadas sin tribuna, chantond lur l'imni.

Ultra da quai ha Flurin preschentà nossa situaziun a chaschun da la sesida da las manaders e dals manaders da las delegaziuns, e quai ha persuadi il comitè d'organisaziun da gidar. Nossas squadras survegnan mintgamai sustegn da giugadras e da giugaders d'altres equipas u da clubs regiunals. Quai mussa che l'Europeada n'è betg mo in'occurrèza sportiva cumpetitiva, ma bain er in spazi, nua che la solidaritad,



Las duas squadras rumantschas davant l'hotel – en plaina posa, dentant anc senza fracass.

MAD

il spiert da cuminanza e l'agid vicendai-vel è da gronda impurtanza.

Gia l'emprim di, gist suenter esser arrivads, avain nus cumenzà cun las preparativas per nossa produciun al di da cultura. Sut la batgetta da *Leander Albin*, che vegn rinforzà bainbaud da

Raffael Summerauer, avain nus già fatg

fracass e chantadas selvadias davant l'hotel. Che nus n'essan betg uschè numerus sco tut las autras squadras n'ans disturba betg. Nus ans legrain da pas-sentar ina bella ed oravant tut chauda (32 grads!) emna da cuminanza en l'Austria. Hop Rumantschia!

La giugadra *Gianna Caviezel* scriva quest'emna di per di da la Europeada.



Pers ils emprims giuus

Sonda passada è stà a Eberndorf/Dobrla l'avertura da la quarta Europeada. Era las duas squadras rumantschas han giugà dumengia lur emprims giuus – dentant betg cun grond success. Las Rumantschas han giugà encunter il Team Koroška/Kärnten e pers cun 17:0. Ed ils umens han giugà dumengia suentermezdi encunter ils Croats da la Serbia. Il resultat 4:0 per ils Croats da la Serbia. Lur proxims giuus èn oz glindesdi. Detagls sin www.europeada.eu. (fmr/dat)